

Kalata gwa bubili ugwa Johani Isyakulongosya

Untumigwa Johani aasimbile kalata ujũ umpimba kũ kipanga kya Kyala. Ikipanga iki ikukikoolela ingamu ijaa nkiikũũ umwimikigwa. Mwa kalata ujũ ikubalagila abiiitiki ukũlũtiila ulũlagilo lwa Jesu ulũ lukũti bagananenge. Kangi ikũbasoka ukũti basimanyege imanyisyo isya butũngũũ, ni manyisyo isya bwanalooli isya Jesu Kilisiti. Ndi syosa isi bikũpilika babũkongege ubwanalooli.

Uluponio

¹ Une ne nkũũũ gwa kipanga kya Kyala, ngũkũsimbila gwe nkiikũũ gwe nsungũligwa pamopeene na baanaako.* Mbaganile nalooli, ngaja niimwene ne mbaganile, looli boope abangi boosa aba bikwitika ubwanalooli boope babaganile. ² Tubaganile paapo uswe tubameenye ubwanalooli, ubwanalooli ubũ buli nkati mu ndumbula syitũ na ubũ aabukwendelelaga ukũja na nuuswe bwila na bwila.

Ubwanalooli nu lugano

* **1:1** 1:1 Gwe nkiikũũ gwe nsungũligwa pamopeene na baanaako Johani ikũmponia unkiikũũ jumo unsiungũligwa, looli ukũjoba ukũti unkiikũũ unsiungũligwa njila ijingi ijaa kũjoba ukũti abandũ abaa nkũpanga kya Kyala.

³ Taata Kyala nū Mwanaake Jesu Kilisiti, bik-wisa kutubombela kwi ipyana, kū kibabiilisi na kū lutengaano. Ifyo aafikujamo nkati mu ndumbula syitū, uswe twe tukubwitika ubwanalooli na twe tuganeene. ⁴ Naahobwike fiijo paapo naapiliike ukuti abaanaako bamo bali mbwanalooli bo muno Taata Kyala aatulagiliile. ⁵ Po leelo bakundwe, ngubapyelesya ukuti tugananege. Ndikubasimbila ululagilo ulupya, looli lo lulalula ulu twapeeliigwe bo tukwanda ukwitika. ⁶ Linga tukuganana, tukunangisya ukuntiila Kyala mbuami bwitū, paapo ukufuma kubwandilo bo tukwanda ukwitika, aatulagiile ukuti tugananege.

Ukujja maaso na basyobi

⁷ Ngujoba isi paapo baboniike abasyobi pakiisu, aba batikwitika ukuti Jesu Kilisiti aaliisile aali nū mbili bo ugu bali nago abandū. Abandū aba bikujoba isyo, batikujoba ubwanalooli, kangi balugu baa Kilisiti.† ⁸ Mujege maaso na bandū abo ukuti Kyala abasaje fiijo umwe, imbombo jinu jilingiisa kaja jaa itolo. ⁹ Umundu gwesa uju ikwinogona ukuti imanyisyo isi ali nasyo nunu ukukinda imanyisyo sya bwanalooli bwa Kilisiti, na uju atikusikola imanyisyo sya Kilisiti, ujo akaja pamopeene na Kyala. Looli gwesa uju ikwendelela ukusikola imanyisyo sya bwanalooli, ujo ali pamopeene na Taata Kyala nū Mwanaake. ¹⁰ Linga umundu ikwisa kumyinu

† **1:7** 1:7 Abalugu baa Kilisiti Kokuti aba bikupinga imbombo jaa Kilisiti.

atikumanyisya imanyisyo isyo isya bwanalooli bwa Kilisiti, mulingammwambililaga pamo ukumpaala mu nyumba syinu. ¹¹ Kukuti mundu ujũ ikummwambilila ali pamopeene nagwe mu mbiibi isi ikubomba.

Uruponio lwa kumalikisya

¹² Ndi na masyũ mingi aga ngulonda ukubasimbila, looli ngigana ukusimba isyo syosa nu bwino mwi ikalatasi. Looli ngusubila ukwisa kumyinu kukubajaatila ukuti twaganile pamaaso. Po aatukwisa kusekela fiijo. ¹³ Abaana abaa ilumbu gwako unsunguligwa bikubaponia.‡

‡ **1:13** 1:13 Abaana abaa ilumbu gwako unsunguligwa bikubaponia Kokuti abandũ abaa nkipanga kya Kyala ikya Johani bikubaponia abandũ aba ikubasimbila.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8